

KFR1M bantu pelajar ringankan beban kos sara hidup semasa belajar di universiti

## Jual makanan serendah RM2

Oleh LUQMAN HAKIM AB. RAHIM  
luqmanhakim.rahim@kosmo.com.my

**KUANTAN** – Kementerian Perdagangan Dalam Negeri, Koperasi dan Kepenggunaan (KPDNKK) melancarkan program Kafe Rakyat 1Malaysia (KFR1M) yang menawarkan menu pada harga yang murah di semua institusi pengajian tinggi awam (IPTA) di negara ini.

Sebagai permulaan, KFR1M dilaksanakan di Universiti Malaysia Pahang (UMP) di sini.

Menteri Perdagangan Dalam Negeri, Koperasi dan Kepenggunaan, Datuk Seri Hasan Malek berkata,

KFR1M merupakan hasil inisiatif pihak swasta bersama kerajaan untuk membantuan mengurangkan kos sara hidup mahasiswa di kampus.

"Melalui program ini, 90 peratus jualan makanan dan minuman ditawarkan secara paket iaitu sarapan pagi dengan harga RM2 bagi 18 pilihan makanan."

"Kafe ini turut menawarkan makan tengah hari dan malam dengan 30 pilihan makanan yang terdiri daripada lapan jenis masakan sayur, 12 jenis masakan ayam dan 10 jenis masakan ikan dengan harga RM4,"

katanya pada sidang akbar selepas merasmikan KFR1M di UMP Kampus Gambang di sini semalam.

Turut hadir Naib Canselor UMP, Profesor Datuk Dr. Daing Nasir Ibrahim dan Pengurus KFR1M, Datuk Tengku Muhammad Sultan Abu Bakar.

KFR1M ujar Hasan, turut menawarkan menu sampingan lain seperti telur dadar, telur masin, sambal tempe serta pilihan lapan jenis minuman yang diberi percuma.

Menurutnya, kerajaan menyatakan sebanyak 10 buah KFR1M lagi akan dibuka pada tahun ini di Pahang dan secara berperingkat di

kampus negeri lain pada tahun depan.

"Kita akan berbincang dengan Kementerian Pendidikan agar KFR1M dapat dibuka di seluruh negara."

"Kemudahan ini bukan saja dapat dinikmati oleh pelajar malah semua warga universiti," katanya.



HASAN bersama Dr. Daing (kanan) melihat harga menu di Kafe Rakyat 1Malaysia di UMP, Kuantan semalam.